

Distchèyance

(texte et musique : Jean-Pierre Clovin)

Téns ! l' facteûr...

Il a passè dins m' bwèsse...

Bén ! ène env'lope toute machuréye ?

Ah ! ça vént d' Mârcinèle : c'èst Djâques !

Maah ! is mèt'nut in euro à ç-t'eûre ?

Is n'ont nén djokè d' raùssî lès timbes :

Dji m' souvéns : quand dj'ai quitè m' pays,
i n' faleut qu' èl' mitan !...

« Èm' chér camarâde, ça fèt lontimps
qui dji voureus bén yèsse à vo place !
Dji sés bén qui vos n' s'rèz nén contint
di sawè qu'à ç-t'eûre, on vike dins l' crasse.

I gn-a trwès mwès d' çoula, ç'a stî m' toûr :
èm' patron n'a pus yeû dandjî d' mi ;
i m'a dit : « Dji conès vos discoûrs :
vo feume, vos-èfants... dins vo guèrnî... »

Jamés, nos n'âris jamés pu l' crwère :
on-a du r'vinde djusqu'à nos-armwères ;
on-a fèt come bran.mint d's-outes, ayèr :
on a dôrmu d'zous dès toles di fiêr !

Zabèle, lès-èfants, èyèt min.me mi,
on-a bré èchène ayèr au gnût.
On-a r'çu lès tikèts pou mindjî ;
gn-a Bén trop d' chômeûs : on n' lès pâye pus...

Dji d'ai co trwès qui n'ont nén crèchu,
co Bén qu' leû scole lyeû pâye à din.nér.
On asprouv'ra d' chûre èl' vîye qu'on chût
mins dji crwès qu'in djoû, ça va san.nér...

On dit qu'on âra in deur iviêr.
Pou s' tchaûfêr, on n'âra pus qu'à bwère !
On crwèt qu' Bén râde, ça va yèsse èl' guère :
ça s'ra l' dérène : on n'âra pus d'istwère !

Ni r'véns pus, ni r'véns jamés droci :
i gn-a pus qu'in désèrt à moustrêr.
(Mins) S'i faut chûre èl' vikériye qu'on chût,
dji crwès qu'in djoû, ça va san.nér... »